



Jumat, 12 April 2024

Ogen: Habakuk 2: 5-8



Kalak Rangap La Pernah Tenang



Rangap/rakus e njemba i bas diri manusia nari. Lebih atena lalap asangkan si nggo lit e. La lit batas arah kerincuhen e. Kenikmaten kai pe, subuk i bas bentuk pangan, gelar si mehaga, duit, barang, ntahpe seks, labo pernah banci erbansa ia puas. Kerangapen e mpepulung barang-barang mewah. Guna sie, perlu ia duit. Kalak pe ijemba guna ngelakoken erbage cara guna mpepuaskan kerangapen si lit i bas dirina. La heran, maka enterem kalak bayak tetap saja jadi pinangko, gelah ia banci ndatken mbue duit ras mpepulung reh buena erta si tuhuna labo ia butuh. Rangap e bermata dua. Ia ncedai kedamen pusuh kalak ras erbahasa nggo terjebak i bas kiniseran. Ia pe ngerugiken kalak sideban terutama kalak si terdedeh hak-hakna erkiteken kerangapen kalak sideban. Kalak si tenggelam i bas kerangapen pasti nggelu i bas kiniseran. Bali ras si isehken Habakuk maka kalak rangap asa digan pe la pernah teneng sabap labo pernah puas iakapna. Atena lalap uga muat sikerajangen kalak, mpebayak diri bagepe mpebue erta-ertana. Emaka ukurna pe ku je nge lalap. Erbahan strategi, cara uga banci mpepuaskan kerangapenna aminna asa ndigan pe labo pernah puas akapna.

Kai akar arah kerangapen? Ia lit erkiteken rasa hampa i bas diri manusia. Manusia memang subjek si lalap kurang. Ia lalap ndarami tapi la pernah idatkenna. Rasa hampa berakar i bas sada hal si mendasar e me kesalahpahaman kerna dirina jine. Guna mengatasi rangap si lit i bas diri manusia, maka ia perlu memahami jati dirina si asli. Rasa hampa i bas diri si tuhuna ilusi. Ia desken asap si reh ras masap janah la lit isi ras bentuk si tetap. Pemahaman e reh arah spritualitas sejati bagi nina Jop, "Kadeku pe la lit asum aku tubuh nai, mate pe aku la pedah lit kadeku pe" (Jop.1:21a). Sabap ulih kerangapen e labo banci si baba ku lubang kubur asum kita mate. Tadingken nge kerina. Saja ngenca kerangapen si ilakoken kita e denggo jumpa nge ras keadilan Tuhan. Janah e arus ipertanggungjawabken.

☞ *"Cukup kap pemere Dibata man bangku"*